



Inuit Ataqatigiit Inatsisartuni

Nuuk, 30. oktober 2007
Agathe Fontain

Inatsisartut suleriaasianni § 36 imm. 1 naapertorlugu Naalakkersuisunut apeqqutit imaattut matumuuna saqqummiuppakka:

Naalakkersuisunut apeqqutit:

Iluoorpa piniarnermut ilinniarfik Uummannamut inissinneqarnissaa suliniutigineqartoq?

Suut tamassumunnga tunngavilersuutaappat?

Suleqatigiissitat tassunga tunngasumik suliaqarnikut ilinniarfiup sumiinnissaa innersuussuti-gaat – aamma nalunaarussiaat pineqarsinnaava?

Iluoorpa august 2007-mi Kommunit allaffigineqartut, aalisarnermik Piniarnermillu inuus-sutissarsiutit inuusutissarsiornerannik siuarsaaneq pillugu Inatsisartut peqqussutaat nr. 10 , 20.nov. 2006-meersoq malillugu, qinnuteqaqqusiunnaarnermik?

Peqqussulluuniit alla malillugu kommunit allaffigineqarsimappat?

(Inatsisartunut ilaasortaq Agathe Fontain, Inuit Ataqatigiit)

Tunngavilersuut:

UKA 2006-imi siunnersuuteqartoqarpoq ima qulequtalimmik: Piniartut inuusutissarsiornerup inuusutissarsiutit ulorianartorsiortinneqarnerata pinaveersaartinneqarnissaa inuusutissarsiutitullu periarfissaasa nutaat patajaallisarneqarnissaat naleqqussarnissaallu pillugit siunnersuusiortussatut suleqatigiissitanik pilersitseqqullugit Naalakkersuisut peqquneqarnissaannik Inatsisartut aalajangiif-figisassaattut siunnersuut.

Naak siunnersuut siunnersuuteqartunit tunuartinneqaraluartoq Aalisarnermut, Piniarnermillu Naalakkersuisoq akissuteqarpoq.

Akissuteqaammi erserpoq piniarnermik inuusutissarsiuteqarnerup siunissami qanoq aaqqissuunneqarsinnaanera pillugu marlunnik suleqatigiissitaliortoqarsimasoq.

Akissuteqaammi erserportaaq suleqatigiissitap aappaani suliarineqartoq piniartumut aalisartumullu ilinniartitaanerulerneq pillugu siunnersuusiorneq.

Suleqatigiissitap suliai tunngavigalugit inassuteqaatit suli timitalerneqanngimmata, Inuit Ataqatigiinnillu piniartut ilinniarfeqalernissaat qangali siunnersuutigineqartarlunilu pingaartinneqarmat timitaliinissaq pisariaqalivimmat matumuuna apeqquteqaateqarpunga.